

三病琅

餘逸瑯

贅漫漫

筆記鈔



病
逸
漫
記

陸
鈞
撰

中
華
書
局

病逸漫記

叢書集成初編所選紀錄彙
編及歷代小史皆收有此書
紀錄所收較歷代爲多故據
紀錄本影印

紀錄彙編卷之二百一

病逸漫記

陸鈺

國朝欽天監每年二月初一日進曆樣十一月朔頒
大統曆於百官進 內有 上位曆七政曆月令
曆士遞曆又上吉日十二紙每月粘一紙于宮門
御屏上又賜諸王有中曆各布政司則皆禮部降
鑄欽天監印以所造曆偏及民間無欽天監印者
私造律處斬

八月聽選監生袁慶祥江西袁州人進一本內言

朝廷賞賜過多所入不當所出刑部尚書董芳不能執法而折辱屬官又言欲慎簡縣令正本清源從學校監胄始黜去衰老以止貪污起用高明夏塤張元禎羅倫奏入送東華門打五十

內閣商輅等上言六事節財用開言路飭邊備足邊餉重地方慎刑罰

雲南鎮守太監錢能獻金銀結絲燈

三里河在天地壇前去通州五十里地形高通州六丈九尺置二閘可行舟但有一二處走沙大通橋去通州四十地形高通州五丈置十閘方可行舟

仁宗皇帝駕崩甚速疑爲雷震又疑宮人欲毒張后
誤中上予嘗遇雷太監質之云皆不然蓋陰症也
錢溥素善內官王倫陳文與溥東西隣謂溥曰倫來
君當見報一日倫至而溥不言文甚嚙之上初
卽位倫以潛邸舊人頗自尊大於老內官若牛倫
輩皆易視之文 仁壽太后初嘗欲見 上于東
宮爲倫所沮以故交惡之遂下倫獄溥坐交通預
草 上卽位詔并下獄黜爲順德知縣文在內閣
頗與力焉

徐有貞初名理 正統十四年建南遷之議內中甚

惡之後吏部擬進輒不見用遂易今名理博學能
文辭任智挾數天順元年以復辟功陞武功伯兵
部尚書兼翰林院學士諸學士草復位詔有貞獨
不署已而上問故有貞乃別挾詔草以進內云
豈期監國之人遽懷當宁之位等語蓋謂 景泰
帝爲篡也

英廟有意江南買辦諸學士難言欲持不可而有貞
度不可言將入對給學士薛瑄云予苦多言恐忤
上意若度稍可當從後觸止之瑄以爲信於其
語半時其後有貞即大聲曰薛瑄欲有所言 上

問言何事瑄倉卒無對即以買辦一事言之上不悅而罷

英國公張輔坐五軍營襄城伯三千營武靖伯趙輔神機營撫寧侯朱永寧西侯蔣琬團營冬夏每月操三日春秋五日間操一月之內凡十五日

錦衣衛校尉五所約八九千人二十四監催事二百五城巡城五百東西廠共二百朱指揮一百袁指揮一百巡店三十名上直每番連官共五百二十力士五所將軍一所清軍所達官

太僕寺丞十二員分管北直隸山東河南地方三年

一易孳生馬匹一牡三牝爲一羣一歲產駒三匹
三年差內官車駕司主事太僕少卿各一員印烙
俵散其送至寺者則給與順天府寄養每歲江南
北共納馬二萬匹江南折銀十兩一匹歲收烙馬
百匹印馬駒用種字印大馬用江字印 遼東養
馬皆恩軍 國初以富民充專養馬匹不以征進
馬毛稀秘而齒少者是老馬所產馬眼光照人見
全身者其齒最少照半身者滿十歲所照漸短其
齒愈大又云識馬有病無病取其毛附掌中相粘
者爲無病粘少者則有病

景泰帝復謚恭仁康定景皇帝

清寧宮本太子所居之宮今皇子既冠者皆居於此

武昌斧山田畝稅五升歲辦杉木板牛皮五百張及蓮肉細茶以充貢

兵部尚書陳公汝言退朝遇太子洗馬劉公定之戲曰君職在洗馬所洗兒何劉應聲曰廐馬皆洗矣獨大司馬洗不得也聞者爲之絕倒

京官有守領官者得稱堂上考滿得單引不出考語其餘如庶子諭德等皆出考語又給事中外除職

事相等得前後通考御史外除則不得通考有司
官考滿至部如戶口不增者送問清軍得三分以
上者得陞其餘雖錢糧未完不在問例

迤北進貢者待之厚於四夷順天府供床褥禮部置
酒宴光祿人日供米一升肉一升酒半瓶又 欽
賜下程每五日五人供羊一隻米五升酒若干賞
賜頭目十六表裏一云八表裏加賜織金其餘各
兩表裏又各人衣服一套靴襪全馬價高者三表
裏次者二表裏其羈留大同者取萬億庫錢糧供
給萬億庫錢糧頗爲大官侵欺以馬草爲名軍士

所得者少而官入已者多

光祿寺教坊司皆禮部支糧教坊司支糧者七百餘人光祿行移俱以手本至禮部禮部爲轉行科以手本至順天府轉行蓋光祿六科皆內府衙門故也

尚寶司所領寶璽凡十二顆第一 皇帝奉天之寶郊天齋醮用之第二 尊親之寶上尊號用之第三 親親之寶有大小二顆 誥命之寶 勅命之寶 廣運之寶用之最多 勅命遠去者悉用一寶封識其文云冊符出驗四方凡寶皆內尚寶

司女官掌之遇用寶則尚寶司以揭帖赴尚寶監
尚寶監請旨然後赴內司領取歲用寶三萬餘顆
歲終尚寶司繳進數目

白浮泉今入清河一畝泉在甕山後已塞甕山下王
龍雙龍青龍等泉入西湖經高良橋注皇城濠一
自西流入內一自東會入通惠四里至慶豐慶豐
十一里至平津慶豐地形高平津一丈許水陡絕
故平津閘開則慶豐河身立見議者欲於慶豐南
添置一閘又云濬慶豐河身然濬深則西淮易至
恐不若增閘之便平江伯陳某盡力欲通舟左右

方阻之或云道士仰彌高爲上言黑青之出爲
濬河之故或云河通則西湖田不可種故權貴止
之迄無成功

子游之武城今兗州府嘉祥縣魯之西郊狩而獲麟
之地

張子房墓云在壽張當再攷

張秋舊云景德鎮西鄆城曹州定陶以至金龍口
正統十三年河決處

禮部選駙馬同司禮監太監欽天監官筭命錦衣百
戶視其隱駙馬曾聘者聽其所從

鄭村壩以鄭當時得名

于準江西餘干人能通五經

天下王府惟蜀府最富楚府秦府次之楚府昭王

太祖高皇帝愛子田地最多故富其他如韓府襄城范德最貧至有喪不能舉衣食不能克者

漢時封王止以皇帝所生之子爲王王之嫡子世爲侯其他支庶皆同庶人但蠲其徭役今王之子爲郡王郡王之子爲鎮國將軍自此以降凡六等至其末世爲奉國中尉故不能無窮迫之弊

王妃之父駙馬之父俱爲兵馬指揮無祿

母雖以子貴然嫡在則不敢並封生母未封則子嬪亦不敢受封

三年湏知考退官老疾者同致仕例罷軟與素行不謹者冠帶閑住但有冠帶無品級一應服色儀仗皆不得用其有贓者爲民

將軍馬日給料四升草十五斤校尉以下馬俱三升
選將軍身長五尺三寸檐城磚一塊重四百斤方
爲中式隸錦衣衛月食米二石五斗侍衛二十年
以上得冠帶此係詔書內事
例不爲常格其數幾千人每直三
百二十四人其四十八人身幹最長分兩番侍立

奉天門東西各十二人其餘布立丹陛左右

廣平侯袁瑄總領宿衛忻城伯懷寧侯輪直宿衛九
門凡十八衛內外開閉圖子手二千六百作兩番
指揮八人日輪一人銀牌一千多少校尉五百三
十將軍三百二十四侯伯以下帶仁字號金牌將
軍以下帶智信等號金牌其餘帶銅牌雖名金牌
亦以銅爲之銅牌式較長

各處之巡撫都御史總兵叅將等俱請雙馬或單馬
或雙船單船符驗先從兵部題本得 旨車駕司
以手本送尚寶司尚寶司又題本得 旨然後給